

[Augsburg], 1. Februar 1560

An Johannes Oporinus

UB Basel, Fr. Gr. I 11, fol. 232r-v.

Steinmann Nr. 723.

Lit.: Husner S. 154 (mit Auszug).

S. P. D. Carinus et ego apud D. Antonium nihil possumus. D. Tonnerus posset multum, si vellet, sed quantum velit, dubito, πανοῦργος ὅν, καὶ τὸ ἐφ' ἔαυτὸν προσκοπῶν. Paruam aut nullam potius habeo spem subsidij. Nostris enim veriss[imis] illis quidem et aeuiss[imis] rationib[us] vno illo occurritur: Sic volo. Gundelij versio minus latina est quam Clauseri, sed in proprijs nominibus explicandis vincit alteram. Non magnam iacturam facies illa non accepta. Negat enim senex se cum iureconsulto sibi quicquam negocij esse velle. Morellianum Demosthenem expecto. Zonaram iampridem relegere caepi. pauca inueni, quae emendationem meam postulent. Nam mei mihi simioli non displicant, et quam displiceant alijs curare desij. Mittam tamen ad te satis maturè meum codicem. Versor nunc in emendando Epicteto et Arriano, cuius partem Francofordiam ad te mitter constitui, vti, cum hic essem, a me petijsti, nec, si edere volueris, praelum remorabor. Nam reliqua vnā cum praefatione breui sequentur. Sed si oppresseris potius quam impresseris: οὐ φροντὶς ἵπποκλείδῃ, cum Scheggij erudita interpretatio sit in manib[us] cuius offenditionem vereor, nec adeò tamen, vt illius δυστροπία conatus meos impedire debere videatur. Annae Caesarissae historia apud nos amplius semisse mutilata est, nec quicquam habet editione dignum. In Gallia tamen breui, si vera sunt, quae iactantur, Graecè Latineqüe edetur integra. Augebit illa libri molem, historiam non augebit. Si D. Antonius meo consilio paruissest, a Zonara de industria praetermissa, multa scitu digna è Cedreno excerptissem. Nunc nihil ne somniandum quidem tale nobis est, illo tam infenso nostris conatibus. Mirabor certè si vel Gregoram acceperis. Sed si acceperis, eumqüe cum Zonara, Choniate, Chalcocandyle coniunxeris: non aspernandum, etsi non perfectiss[imum] nec elaboratiss[imum] Byzantinae historiae corpus studiosi a nobis habebunt. Sed vt ad Epictetum redeam et Arrianum: si horum editio cordi tibi fuerit, enchiridij forma, sed charta grandiore et charactere εὐαναγνώστῳ, mihi probabitur, ac tibi etiam vt opinor. Mense Nouembri, nisi fallor, ter ad te scripsi, sed è literis tuis apparent, nullas a me tibi esse redditas. Vale. Cal[endis] Febr[uarij]. 1560.

Hiero[nymus] Wolfius  
T[uus].